

di San Marco a l' altar di San Jacomo, dove sia fato una palla di bronzo con la Nostra Dona, San Piero e San Zuan Batista, e scrive il modo di l' archa. *Item*, lo anniversario si fazi, dove sia il principe, oratori, consieri e tutti di pregadi. El principe habi ducati 3, li consieri ducati uno, il resto lire tre, et uno torzo di la soa compagnia. *Item*, siano perpetui 4 mansionarij. *Item*, al principe e consieri, in tempo di qual si farà la sua archa, habi ducati 300, de certo legato, per uno. *Item*, a' soi parenti: a sier Piero Zen, ducati 3000; a sier Alvise Zen, *quondam* sier Francesco, ducati 1000; a sier Silvestro Zen, ducati 1000; a sier Hironimo Zen, *quondam* sier Piero, ducati 6000; a sier Bachalario Zen, el cavalier, ducati 1000; a sier Fantin Zen, ducati 100; et a sier Tomà Zen, el cavalier, 0. A la chiesa di San Fantin, per la fabrica, ducati X milia; a la chiesa dil Santo a Padoa ducati 5000; a li do episcopi nominati, et do camerieri, ducati 5000; ad alcuni soi, ducati 300 per uno; et al resto di la fameia, ducati 20 per uno e una cavalchadura; li razi e tapezarie a le abacie e certi ducati; et li arzenti, 8 pezi grandi, a la Signoria nostra per li pasti dil doxe; el residuo lassa al pontifice et a la Signoria, per mità. Il testamento è molto longo; lassa commissarij li procuratori, et ducati 2000 per comprar monte nuovo, e dil pro' tenir li do capelani, di anni 40 in suso, a San Fantin. L' archa di bronzo vol sia alta di terra uno pe' e mezzo, stia sempre coperta di panno d' oro; e, fruado quello, sia posto un novo con un tapedo. *Item*, ducati 12 milia da esser compra' monte nuovo e il pro' dato ai procuratori per li 4 capelani, che siano canonici, habi ducati 50 per uno. *Item*, al vescoo' di Vicenza ducati.....; a le abatie di San Zen di Verona, Carara, e Nervosa ducati 1000 per una, e certe tapezarie è a chadauna chiesa. *Item*, a chadauna chiesa che li dava intrada li lassoe, per rata di l' intrada, le soe tapezarie *etc.*, e dil residuo al papa et a la Signoria, con questo siano spesi contra il turco; fo dito saria ducati 140 milia. *Item*, lassò a li procuratori li soi arzenti; si dice per assa' summa, tra i qual è lavori d' oro masizi, zoè tajeri, seudele e seudelini *etc.*, per dar a manzar a dodese persone; con questo siano prestati a li doxi per li soi pasti et altre cosse lassò.

Et a di 9 mazo, gionse in questa terra e fu posto nel santuario. Portati da Padoa per sier Ferigo Contarini, di sier Zuan Alvixe, camerlengo, cinque forzieri con li danari di ditto cardinal, qualli fonno numerati ducati 64 milia et 700; poi fo portà li forzieri con li arzenti, tapezarie et altro. Et vene uno messo

a Padoa dil legato con uno breve dil papa, excomunicava *etc.*, perchè el papa voleva lui li danari. Or el corpo, a di 8 da sera, fo portà in domo, e posto in una cassa imegolata, in la sagrestia di l' altar di San Zorzi senza farli altro exequio fino el sarà condotto a Veniexia. Era posto hordine al levar il corpo di caxa con li preti, sonar campane *etc.*, *tamen, nescio causam*, 0 fu fato. Erano a Padoa 4 parenti rimasti, sier Fantin, sier Piero, sier Alvise e sier Silvestro Zen; et fo ditto li fo dato ducati 1000 per uno, a conto dil suo legato; et a di 9, intendendo li retori erano stà robati danari, fono refenuti do servitori, l' uno havia tolto ducati 1700 e l' altro 500; et per uno ofical fo trovato in cha' di una meretrice ducati 1700 in uno zipon cusidi. E quel ofical, manifestò averli trovadi, fo una bestia; doveva partirsi con quelli pochi *etc.* Tutti si miravioliò havesse si pochi danari, a quello si giudichava; perchè havia intrada ducati....., et pocho spendeva, con opinion, con li soi danari, farsi papa. Et in Ancona havia do forzieri con danari; et l' aconitano, suo favorito, era morto, si l' non moriva conduceva ditto cardinal fuori e li lo l' tossichava. *Item*, in Bethelen, a Padoa, si dice è un forzier con danari, et in San Bernardin e altrove; e intisi che uno di soi, che sapeva li secreti, have a dir, 8 zorni poi morto, reveleria uno secreto, dove fusseno li soi altri danari ascosi; et anche a Roma havia danari. Et è da saper, che in Ancona fo trovato poi in uno monaster li ducati 20 milia, quali il papa li mandò a tuor; et a Padoa la Signoria, in Bethlem, troveo altri ducati X milia.

In questi zorni a Veniexia fu fato una precession per San Zuminian, justa il consueto. Portò la spada sier Alvixe Soranzo, eleto capetanio in Barbaria, ma non andò, perchè si amalò.

Da Sibinico. Vene come turchi erano corsi, 1500 cavali, vicino a la terra; menò via 40 anime, 1500 animali; e nostri li fo contra e fo morto uno citadin di nostri.

A di 8 mazo. Fo dito, le galie di Alexandria 16 erano zonte al Zonchio a presso Modom, ma tal nova non si credè.

Fu preso, come ho scritto di sopra, dar tre page a le nostre zente d' arme, e farli la mostra, casando alcuni condutieri; e scritto al conte di Pitiano e al signor Bortolo d' Alviano, stagino in hordine, con l' loro compagnie, per cavalchar in Friul, dove sono li stratioti; e questo, per avisi abuti, che Scander bassà adunava in Bossina da turchi XV milia, vedendo non seguiva la liga col re di Hongaria.

A di 10. Essendo reduto pregadi, veneno letere